

Ilisimatusarfimmi Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnigorniarfissamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Najaaraq Møller, Siumut)

Akissuteqaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartunut ilaasortaq, Najaaraq Møller, Siumut, siunnersuuteqarneranut qujaffigaara.

Naalakkersuisut ilinniartitsisut, perorsaasut aamma isumaginninnermut siunnersortit kandidatit ilinniarnermikkut, ilinniakkaminnik qaffassaanissamut periarfissaqalersinneqarnissaat pillugu siunnersuuteqartoq isumaqatigaat. Taamaallutik ilinniakkaminni naatsorsuutigineqartut suliasaminut piginnaasaqarnerulissapput.

Ilinniakkat taakku pingasut, iliniartitsisut, perorsaasut isumaginninnermullu siunnersortit ilinniakkamimmi arlalitsigut assigiissuteqarput, inuit, taakkua ajunngitsuunissaat. ineriartornissaallu ukkatarisaramikkut. Ilinniakkani taakkunani pingasuni iliniarsimasunik oqaloqateqarnermi paasinarsivoq iliniartitsisut perorsaasullu arlalitsigut assigiissuteqartut, tassami ilinniagaqarnerminnut atatillugu inuit sullinnissaannut tunngasunik ilinniagaqaramik. Paarlattuanilli isumaginninnermut siunnersortit annertunerusumik inuiaqatigiinnut sammisunik suliaqarnerusarlutik. Taamaattumik ajornakusuussaaq ilinniaqarfinnut taakkununga pingasunut naleqquttumik ataatsimut ilinniartitsisusiornissaq. Taamaattumik siunertaqarnerussaaq sammivinnut marlunnut assigiinngitsunik kandidatit ilinniakkanik suliaqaraanni, tassa inunnut sammisumik aamma inuiaqatigiinnut sammisumik. Akuttunngitsumik takuneqarsinnaasarpog kandidatit ilinniagallit pisortatut inissisimasarneri, tamannalu aamma ilinniakkanut taakkununga pingasunut atuutissaaq. Taamaattumik ilinniagassanut taakkununga marlunnut siunnersuutigineqartut kandidatit ilinniartitsigaanni iluanaarutaasinnaassaaq. Aammattaaq eqqaasinnaavara Ilisimatusarfimmi kandidatit ilinniagaq nutaaq isumaginninnikkut suliaqarnermi siunnersortit aammalu aqutsisutut pilersinneqarnissaanut periarfissanik misissuisoqarmat.

Ilinniartitsisunik, perorsaasunik isumaginninnermullu siunnersortinik ilinniakkamik naammasserlaanik pisariaqartitsinerujussuarmi, ilaasa kandidatit ingerlaqqinnerat naammaginarpallaassanngilaq. Bacheloritut naammassisut amerlasuut ilaqutaqalersimasarput, taamaattumillu tamakkiisumik sulinermi aningaasarsiaqarnissamut pisariaqartitsisarlutik. Ilinniakkalli taakku marluk piffissap ilaatigut ingerlanneqarsinnaappata peqatigisaanillu ilinniakkamut tunngasumik bachelorinnguutigisimasamik sulilluni suliffissaqartitsiniarnermi pisariaqartitat matussuserneqarsinnaapput. Kiisalu siorngatigut bacheloritut iliniarsimasut maannakkullu suliffeqartut taamatuttaaq kandidatit ilinniarnissamut qinnuteqarsinnaanngussapput taamaallunilu kandidatit iliniarsimasut amerlaningussallutik.

Piffissap ilaatigut ilinniarnissamat siunnersuut inunnik sulisunik ingerlanneqarsinnaavoq, kisiannilu Nuummiinnaq, Ilisimatusarfik inissisimalluni. Paarlattuanilli ilinniakkat taakku marluk alimasissunik ilinniakkatut ingerlakkaanni piffissaq sivikitsoq itinerusumik ilinniariartarluni, piffissap ilaatigut ilinniartut nunatsinni sumiluunniit suliffissarsiorsinnaassapput taamaalillunilu illoqarfiit allat sulinerannik aamma iluaquserneqarsinnaallutik.

Tamanna tunngavigalugu Naalackersuisut matumuuna imaattumik allannguutissatut siunnersuusiorput:

”Naalackersuisut kandidatitut ilinniakkanik marlunnik imminnut ataqatigiissunik allartitsisoqarnissaanut periarfissanik misissueqqullugit peqquneqarnissaannik Inatsisartut aalajangiiffigisassaattut siunnersuut, taamaalillutik ilinniartitsisut, perorsaasut, isumaginninnermilu siunnersortit tamakkiisumik sulinermik saniatigut kandidatitut ilniarsinnaalissallutik. Misissuinerup imarissavaa, ilinniakkani aamma ilinniartunut kissaatigisat, pisariaqartitat aningaasaqarnerlu. Tamanna pillugu nalunaarussiaq innersuussutitalik kingusinnerpaamik UPA2025-mi Inatsisartunut agguanneqassaaq.”